

E hoa ma, e,
Hurihuri iho ra
Te kiri o te makau,
Ka moe i te hau, na i.

'A whakarewaia
Te kauri i te wai, e i,
'A tu mai koe
I te ihu o te waka, e i,
I te nui 'Ati-Mani'
I te rahi Waikato, e i,
Hei kawē i a koe
Te whatu o Uenuku, e i.
Kohari kau ana
Nga whetu o te rangi, e i,
Tuhera kau ana
Te riu o Tainui.
Ka whati ra, e,
Nga puhi o te waka, e;
Taku manu kohe ata
Ka tiu ki te muri, na i.

'Ati-Mani': Ngati-Maniapoto.

195.—HE WAIATA,
Na Potatau Te Wherowhero
(Waikato).

Na Te Tahuna Herangi nga kupu, nga whakamarama.

Ko te whakamarama tenei a Te Tahuna:—"He waiata na Potatau i a ia e noho na i Mangere. Ka tae nga rangatira o te pito ki te tonga o Waikato, a Te Aho, a Te Wetini Taiporutu, a Pakaroa. Ko te timata tonu tena o te whakaara i te *Kingi Maori*. Ka tu a Potatau, ka waiata i te waiata nei."

I taia te waiata nei ki te pukapuka a McGregor, 'Maori Songs' (S.55); kei reira e kiia ana, "Mo nga kai, i kainga e te kiore." I taia ano hoki ki te Waka Maori (W.M. 8/156) a ki te pukapuka a John White (W.4/8, W. 5/6).

Ko Potatau te rangatira maori i whakaturia hei *Kingi*, nana a Tawhiao; na Tawhiao ko Mahuta; na Mahuta ko Te Rata. Na Tiahuia, he tuahine no Mahuta, no runga ake i a Mahuta, a Te Puea; ko Te Tahuna, nana te whakamarama i runga nei, te papa o Te Puea.

(Ref.: S.55, W.M.8/156, W. 4/8, W.5/6).

Tenei ka noho, ka hihiri ngakau o tangata
Ki te mahi e takoto mai nei.
Ki kona e te rau taupu noa mai ai,
'A piki ake au ki runga te kiritai,
Nga manu e wheko i raro o Rangiahua.
Homai ano koe kia ringia iho,
E tapu ana, e ihi ana
I a Rongo-whaka-hirahira.